

EL MANIFIESTU FOI LLEÍU N'ASTURIANU

El "drechu al albuertu" xunta en Xixón a más de mil persones

Más de mil manifestantes percorrieron na tarde del xueves les cais de Xixón pa desixir la "despenalización del albuertu" y el "drechu de la muyer a decidir sobre'l so propiu cuerpu". Un total de cincuenta colectivos yeren los convocantes d'una manifestación qu'axuntó organizaciones de muyeres, sociales, sindicales y polítiques.

Nel manifiestu, lleíu pola periodista Beatriz R. Viado n'asturianu, los colectivos ficiéron por manifestar "el nuestro sofitu y solidaridá coles muyeres investigaes por exercer l'albuertu y colos y coles profesionales qu'hasta esti momentu lo ficiéron posible", al tiempu que-y desixíen al gobiernu resultante de les elecciones del 8 de marzu un "compromisu claru y decidíu pa que l'albuertu se reconozca como un drechu, exercíu dende la llibre decisión de les muyeres y garantizáu na rede sanitaria pública".

Los asistentes, que cantaron proclames como "nun se ven los qu'albuerten del PP", cargaron sobre manera colos que calificaron como "estayes relixoses más fundamentalistes y les dreches polítiques ultraconservadores", grupos a los que consideraron responsables de "d'imponer el so modelu de familia patriarcal, qu'atenta escontra la llibertá de les muyeres y ta basáu nel control de la nuestra sexualidá".